


前三百

越  
峯  
徽  
傳  
賢

錄  
藁  
志





成集書叢

編初

者編主  
五雲王

行發館書印務商



百越先賢志



歐大任撰

本館據嶺南遺書  
本排印初編各叢  
書僅有此本

# 百越先賢志自序

粵越一也。禹貢周職方。揚州外境五嶺至于海。盡越之南裔。始禹周行天下。還越會計諸侯。少康封庶子。無餘於會稽。以奉禹祀。文身斷髮。披草萊而邑焉。無餘後二十餘世。至允常子句踐。竟滅吳稱王。徙都瑯琊。雄方國矣。句踐六世至王無疆。伐楚。楚熊商敗之。無疆去瑯琊止東武。越遂散。諸子或爲王。或爲君。濱於江南海上。臣服於楚。謂之百越。蓋揚州分野。會稽以南。星紀鶉尾。實負南海。嬴秦滅楚。王翦略取揚越。漸爲三郡。曰南海。曰桂林。曰象尉。陀子孫歸漢。合浦蒼梧鬱林交趾九真兼儋耳珠厓郡而九矣。今自南越北屆姑胥。盡會稽之境。故夫越也。東自無諸都東治至漳泉。故閩越也。東海王搖都于永嘉。故甌越也。譯吁宋舊壤湘灘而南。故西越也。牂牁西下邕容綏建。故駱越也。漢人謂越近海。多犀角玳瑁珠璣銀銅。果布之湊。豈但然乎。陽德之盛。鍾爲人文。衣冠禮樂之不於唐虞聲教暨南交始邪。余聞太史公曰。越雖蠻夷。其先豈嘗有大功德於民哉。夫句踐在春秋書於越。入吳夷之也。其時越之人。蓋有爲苦身戮力。深謀祕計。以報羈棲之恥。號令中國而尊周室者。卽秦漢以來。騶氏之爲無諸。爲搖。趙氏之爲陀。爲光。越人左右毗贊之者不少。至劉氏東西二京。功業文章之臣。出于越之南北七八千里。薄海至交州益多矣。於是綜史牒。摻遺佚。自周迄漢百二十人。荒渺遼邈。大賢小賢。故備錄焉。章武黃初。下逮唐宋。別爲紀載。不爲漏略。此則志百越先賢云。嘉靖三十三年十一月長至日嶺南歐大任序。

# 百越先賢志凡例

一兩漢輿地志。吳越之境。皆會稽郡。別爲丹陽豫章。故會稽之越。夏禹苗裔也。星散之後。爲王爲君長。濱於江南海上。百越之所繇名。因其君長所居地。實遠至南海桂林。漢以後。州郡分隸。名以代殊。今志人物。原本百越。按其實也。廬鳳淮揚。在漢爲東海臨淮二郡。雖漢志盡屬吳分。不得強同。

一會稽秦置郡也。地最廣斥。漢分爲吳郡。然地卽太伯吳國。南方精華之學。蓋有孔門之教焉。今志所載漢之會稽。漢之南海。人士居多。諸郡什一。廣陵固有邵平徐璆。淮陰固有韓信枚乘。舒六固有英布文翁。沛上固有蕭曹諸人。非可因吳分而並存。卽子游季札。亦不錄也。一志內人物。如隱逸方外。俱依世代。並與功業文章之士。皆曰先賢。孔門且謂賢者識大。不賢者識小。皆爲可師。故稱先賢。非故襲襄陽耆舊。荆楚陳留先賢而爲斯編也。

一百越人物。年歷久遠。前代記載。詳略不同。今小善必錄。不泯其名。大賢功行。卽馬班紀載。或刪繁一二。固所不免。志專於詳載。故不加論贊。

# 百越先賢志卷一

明 順德歐大任 伯撰

## 歐冶子

歐冶子越人與吳人干將同師俱能爲劍。越王允常使造五劍。五金之英。太陽之精。紫氣托秀。出之有神。服之有威。可以折衝拒敵。楚王召風胡子問之曰。寡人聞吳有干將。越有歐冶子。此二人甲世而生。其作劍三枚。一曰龍淵。二曰泰阿。三曰工布。風胡子奏之。楚王見而大悅。問曰。此三劍何物可象。其名爲何。風胡子曰。欲知龍淵。觀其狀如登高山。臨深淵。欲知泰阿。觀其鈇。巍巍翼翼。如流水之波。欲知工布。鈇從文起。至脊而止。如珠不可衽。文若流水不絕。晉鄭聞而求之不得。興師圍楚。三年不解。楚王引泰阿登城。麾之三軍。破敗流血千里。晉鄭之頭畢白。楚王曰。劍威耶。寡人力耶。風胡子曰。劍之威也。因大王之神。軒轅神農赫胥之時。以石爲兵。黃帝之時。以玉爲兵。各有使然。當此之時。鐵兵神也。大王有聖德。楚王曰。楚人聞命矣。據吳越春秋。絕書參修。

## 疇無餘謳陽

疇無餘。謳陽。越二大夫也。越伐吳。爲二隧。先及郊。吳太子友。王子地。王孫彌庸。壽於姚。自泓上觀之。彌庸

見姑蔑之旂曰吾父之旂也。不可以見讐而弗殺也。太子曰戰而不克將亡國請待之。彌庸不可。屬徒五千。王子地助之戰。彌庸獲疇無餘。地獲謳陽。越兵至。王子地守復戰。大敗吳師。獲太子友。王孫彌庸壽於姚。遂入吳。吳王方會諸侯於黃池。欲霸中國。以全周室。其人告敗。惡其聞也。斬七人於幕下。據左傳史記參修。

大夫種

文種字子禽。官大夫。吳敗越於夫椒。越王勾踐以餘兵五千人保棲會稽。令三軍曰。凡我父兄昆弟及國子姓。有能助寡人謀而退吳者。與之共知越國之政。種對曰。臣聞之賈人。夏則資皮。冬則資絺。旱則資舟。水則資車。以待乏也。譬如簞笠。時雨既至。必求之。今君王既棲於會稽之上。然後乃求謀臣。不亦晚乎。勾踐曰。苟得聞子大夫之言。何後之有。執其手而與之謀。遂使之行成於吳。與宦士三百人。卑事夫差。勾踐請為臣。妻為妾。夫差用大宰嚭之言。赦越。勾踐反國。苦身焦思。坐臥飲食嘗膽也。問於種曰。伐吳何能有功乎。種曰。伐吳有九術。尊天地。事鬼神。一。重財幣以遺其君。二。貴糴粟。以空其邦。三。遺之美好。以勞其志。四。遺之巧匠。使起宮室。高臺榭。以盡其財。疲其力。五。遺其諛臣。使之易伐。六。彊其諫臣。使之自殺。七。邦家富而備器。八。堅厲甲兵。以承其弊。九。勾踐曰。善。種行貨粟。以下其事。子胥諫不聽。再修下吏之獻。夫差受殿材而起姑胥之臺。樂美女而納西施。鄭旦。嚭復讒子胥。夫差大怒曰。伍員託子鮑氏。果欺寡人。反明矣。使人賜屬鏃劍以死。因任嚭政。越乃興師伐吳。大敗之於秦餘杭山。滅吳。擒夫差。而戮嚭與其妻子。國

語·史記·吳·春秋·越絕書參修·



計倪

計倪者先葵邱濮上人。姓辛氏，字文子。其先晉國亡公子也。南游於越，范蠡師事之。越王勾踐既反國，欲圖吳，乃召計倪而問焉。計倪曰：君人尊其仁義者，治之門也。士民者，君之根也。開門固根，莫如正身。正身之道，謹左右。左右者，君之所以盛衰者也。願王選左右，得賢而已。昔太公磻溪之餓人也，西伯任之，而王管仲、魯之亡囚，有貧分之毀，齊桓得之而霸。故曰：失士者亡，得士者昌。越王曰：反國五年，豈不使賢任能，各殊其事？孤冀聞報復之謀。計倪曰：興師者，必先蓄積。食錢布帛，不先蓄積，士卒數饑，不可以戰。越王曰：孤聞先生明於治歲，欲聞其術，以爲教常。計倪曰：省賦斂，勸農桑，因熟積以備四方，毋如會稽之饑，不可再更。臣聞王自耕，夫人自織，此竭於庸力而不斷，時與智也。時斷則循，智斷則備。知此二者，形於體，萬物之情，短長逆順，可觀而已。越王曰：請問其要。計倪曰：太陰三歲處金則穰，三歲處水則毀，三歲處木則康，三歲處火則旱，故散有時，積糴有時，領則決，萬物不過三歲而發矣。天下六歲一穰，六歲一康，十二歲一饑，是以民相離也。故聖人爲之豫備。湯七年旱而民不饑，禹九年水而民不流。越王曰：善。大夫扶同苦成，嘗與孤議於石室，孤非其言也。今先生言獨與孤比，請受教焉。計倪曰：糴石二十則傷農，九十則病末，農傷則草木不辟，末病則貨不出，故糴高不過八十，下不過三十。農末俱利矣。越王又曰：善。計倪乃傳其教而圖之曰：審金木水火，別陰陽之明，用此不患無功。越王著其法，治牧江南，七年而禽吳也。

參修

據史記·吳越春秋·越絕書

范蠡

范蠡字少伯。越之上將軍也。其始居楚宛五戶之墟。倜儻負俗。時人盡以爲狂。文種爲宛令。笑曰。士有賢俊之姿。必有佯狂之譏。內懷獨見之明。外有不知之毀。此固非二三子之所知也。從官屬駕車往。終日而語。疾陳霸王之道。越王勾踐卽位三年。欲伐吳。范蠡進諫曰。夫國家之事。持盈者與天。定傾者與人。節事者與地。王無早圖。夫吳君王之吳也。王若早圖之。其事將未可知也。居三年。越王三問謀吳。三曰。王姑待之。其後四年。越王復問。范蠡曰。可矣。勾踐乃發習衣三千。教士四萬人。君子六千人。諸御千人。伐吳。吳師敗。越遂復棲吳於姑蘇之山。范蠡爲書辭越王。請從會稽之誅。乃裝其輕寶珠玉。與其徒屬乘舟浮海。出齊。變姓名。自謂鴟夷子皮。耕於海畔。齊人聞其賢。以爲相。間行止於陶。稱陶朱公。後莫知其所終。越王命工以良金寫其狀。而朝禮之。表會稽山三百里以爲奉邑。曰。後世子孫有敢侵蠡之地者。使無終沒於越國。皇天后土。四鄉地主。正之。

據國語。史記。越絕書。會稽典錄參修。

薛燭

薛燭。越王客也。善相劍。王示之豪曹。燭曰。豪曹。非寶劍也。夫寶劍五色並見。莫能相勝。豪曹已擅名矣。非寶劍也。王示之巨闕。燭曰。非寶劍也。寶劍者。金錫和銅而不雜。今巨闕已雜矣。非寶劍也。王取純鈎示之。燭瞿然望之曰。光乎如屈陽之華。沈沈如芙蓉始生於湖。觀其文如列星之行。觀其光如水之溢塘。觀其斷巖巖如瑣石。觀其色煥煥如冰釋。此所謂純鈎耶。王曰。是也。客有市之鄉三十。駿馬千疋。千戶之都二。

其可與乎。燭曰不可。夫魚腸湛盧盤郢，皆在吳矣。赤堇之山，已合若邪之溪，深而不測。歐冶子已死，雖有傾城量金珠玉，竭河猶不可與。鄉三十駿馬千疋，千戶之都，二何足言哉。王曰善。據吳越春秋。越絕書。古劍錄參修。

陳音 秦伊附

陳音，楚人也。范蠡進於越王，爲越射卒。越王問曰：孤聞子善射，道何所生？音曰：臣聞弩生於弓，弓生於彈，彈起古之孝子。越王曰：孝子彈者，奈何？音曰：古者人民樸質，饑食鳥獸，渴飲霧露，死則裹以白茅，投於中野。孝子不忍見父母爲鳥獸所食，故作彈以守之，絕鳥獸之害。故歌曰：斷竹續竹，飛土逐肉。於是黃帝弦木爲弧，剡木爲矢，黃帝之後，楚有弧父，射傳於羿，羿傳逢蒙，逢蒙傳琴氏，當是時，諸侯相伐，兵刃交錯，弓矢之威，不能制服。琴氏乃橫弓著臂，施機設樞，加之以力，然後諸侯可服。琴氏傳之楚三侯，所謂句亶鄂章人號蹉侯、翼侯、魏侯也。三侯傳至靈王，桃弓棘矢，以備隣國。臣先人受之於楚五世矣。越王曰：願聞正射之道。音曰：射之道，身若戴板，頭若激卵，左足蹉，右足橫，左手若附枝，右手若抱兒，舉弩望敵，翁心咽烟，與氣俱發，得其和平，神定思去，去止分離，右手發機，左手不知，一身異教，豈況雄雌。此正射持弩之道也。越王曰：善。願悉教吾國人。音教射三月，軍士皆能用弓弩之巧。音死，越王傷之，葬國西五里射浦。曰：陳音山。越王又有客秦伊，善灼龜，戰必得龜食，乃陣民山西大冢，爲秦伊山善灼龜者冢也。據越絕書。吳越春秋參修。

諸稽郢 扶同苦成，鼻如舌，脣暗通附

諸稽郢，越大夫也。吳王夫差起師伐越，以報構李。越王勾踐逆之江，吳大敗之於夫椒。越命諸稽郢行成。

於吳曰。寡君勾踐。使下臣郢私告於下執事曰。昔越得罪於君王。親舉玉趾。以心孤勾踐。而宥赦君王之於越也。緊起死人而肉白骨也。孤不敢忘天災。其敢忘君王之大賜乎。今勾踐申禍無良。以重得罪於下執事。匍匐率二王之老親。委重罪。頓顙於邊越。固貢獻之邑也。勾踐請盟一介嫡女。執箕帚以咳姓於王宮。一介嫡男。奉盤匱以隨諸御。春秋貢獻。不解於王府。君王豈厚裁之。亦征諸侯之禮也。諺曰。狐狸埋之而狐搢之。是以無成功。君王旣封殖越國。名聞於天下。而又刈亡之。是天之無成勞也。四方之諸侯。則何實以事吳。敢使下臣盡辭。唯君王秉利度義焉。吳王許之。將盟越。又使諸稽郢辭曰。以盟爲有益乎。前盟口血未乾。足以結信矣。以盟爲無益乎。君王舍甲兵之威。以臨使之。而胡重於鬼神而自輕也。吳王乃許之。荒成不盟。於是越王以甲楯五千。保棲會稽之上。謂諸大夫曰。何以教寡人。大夫扶同曰。昔湯繫於夏臺。伊尹不離其側。文王困於石室。太公不棄其國。興衰在天。存亡在人。夏殷恃力而虐二聖。兩君屈己以得天道。故湯不以窮自傷。文不以困爲病。大夫苦成曰。天有歷數。德有薄厚。黃帝不讓堯。傳天子。三王臣弑其君。五霸子弑其父。今世猶市置貨以設詐。抱謀以待敵。不幸陷厄。求伸而已。大夫臯如曰。臣聞大夫種。忠而善慮。民親其知。士樂爲用。委國一人。其道必守。何順心佛命。羣臣大夫舌庸曰。大夫文種。國之梁棟。君之爪牙。夫驥不可與匹馳。日月不可並照。君誠委國於種。則千綱萬紀。無不舉者。越王曰。大夫之論是也。大夫皓進曰。一心齊志。上與等之下。不違令。動從君命。修德履義。守信溫故。臨非決疑。君誤臣諫。直心不撓。舉過列平。不阿親戚。不私於外。推身致君。終始一分。臣之事也。諸稽郢再拜曰。君苦身焦思。臥蓼嘗

膽拊循士民與百姓同其勞宗廟社稷之主是在君矣越王曰寡人爲吳窮虜有諸大夫以保社稷寡人何憂焉居七年吳方會諸侯於黃池越發兵伐吳大敗之於缺又郊敗之三戰三北遂入吳圍王宮吳王使公孫雄肉袒膝行請成曰孤臣夫差敢布腹心異日嘗得罪於會稽夫差不敢逆命得與君王成以歸意者今亦欲如會稽之赦孤臣之罪乎越王曰昔天以越賜吳而吳不受今天以吳賜越孤敢不聽天之命而聽君之令乎乃不許成越既平吳以兵渡淮與齊晉會於徐州致貢於周周元王賜胙命爲霸宋鄭魯衛陳蔡執玉之君皆朝夫唯能下其羣臣以集其謀故也

據國語·史記·吳越春秋·越絕書參修。

### 高固

高固越人也世在越稱齊高傒之族楚熊商滅越而臣服之是爲楚威王固歸楚爲威王相時魯左邱明因孔子史記具論其語成左氏春秋鐸椒傅威王以王不能盡觀春秋采取成敗卒四十章爲鐸氏微由固進之楚以故文教日興五羊銜穀萃於楚庭後南海繪諸郡廳稱五羊城自固始

據史記·裴淵廣州記·黃恭交廣記參修。

### 史祿

史祿其先越人贅婿咸陽祿仕秦以史監郡時始皇帝伐百越使尉屠睢發卒五十萬爲五軍遣祿轉餉鑿渠而通糧道祿乃自陽山道水源以湘水北流入于楚灑江爲牂牁下流南入于海轉餉爲勞乃量爲磯以激水於沙磧中疊石作鐮派湘之流而注之灑激行六十里置陡門三十有六舟入一陡則開一陡使水積漸進故能循崖而上建瓴而下通舟楫又利灌田號爲靈渠於是殺西甌君譯吁宋越人皆入叢

薄中與禽獸處莫肯為秦夜攻殺睢秦乃發適戍以備之祿留揭嶺長子孫揭陽令定其後也。據史記漢書水經注

黃恭交廣記參修。

梅銷合傳胡害毋餘附

梅銷越人其先越王子孫也。避楚在丹陽臯鄉更姓梅居梅里。周末散居沅湘。秦併六國越後稱王者除零陵往南海。銷從之。至臺嶺家焉。乃築城滇水上。奉王居之。謂之梅將軍城。姓其臺嶺曰梅嶺。秦之亂。番禺令吳芮甚得江湖間民心。號番君。江中羣盜數千人皆歸之。百越已皆畔秦。推雄傑為長。遂長銷。下令舉兵。戶出壯士一人。領以戶將。使合傳胡害將之。戰則編為什伍。領以隊將。使搖毋餘將之。統其衆歸芮。留其將庾勝兄弟守臺嶺。行見芮。勸從沛公伐秦。芮遣銷將百越兵應諸侯。至南陽遇沛公。與攻析郟。降之。胡害毋餘二人者皆為沛公都尉。從破秦。及楚漢相王。以芮率百越佐諸侯入關。故立芮為衡山王。都邾。而銷為芮將。功最多。封十萬戶。為列侯。食臺以南諸邑。謂之臺侯。項籍死。高帝以銷有功。從入武關。二都尉又皆擊項籍有功。比臺侯。胡害封貫侯。毋餘海陽侯。據史記漢書越絕書參修。

公師隅

公師隅者粵人也。越王無疆為楚所敗。其子孫遷處江南海上。周赧王時有自立為王者。隅以無疆初避楚居東武。有恠山浮來。鎮壓其地。因名東武山。乃往相度南海。將依山築南武城以擬之。而越王不果遷。時三晉惟魏最強。越王與魏通好。使隅復往南海。求犀角象齒以修獻。久在嶠外。乃得諸琛。併吳江樓船。

會稽竹箭獻之魏。魏王乃起師送越王往荆。棲之沅湘。於是南武疆土。爲越貢奉邑。稱雄交廣矣。據竹書紀年。黃恭

交廣記。盛宏之。荆州記參修。

### 張買

張買。粵人也。父戊。以越騎將軍與華無害。從高帝起留。入漢定三秦有功。未及封而死。買少善射。知書。拜中大夫。孝惠帝時。侍游苑池。鼓櫂能爲越謳。時切規諷。不自言父戰勳。高后稱制。丞相審食其。乃言買父戊。從軍時勞動。與終陵侯華無害同。而身死。子未有食邑。於是封買爲南宮侯。傳其子生。遂家長安。建元初。有罪奪爵。光和中。粵民祠買。祠曰秉正云。據漢書年表。廣州舊志參修。

### 鄭嚴田甲

鄭嚴田甲。武帝伐南越。二人首以越人歸漢。帝令越人善射馳馬者爲越騎。使二人將之。並封歸義侯。號其衆爲越侯兵。元鼎五年秋。蛙與蝦蟆羣鬪。占者謂南方兵兆。會呂嘉作亂。遂命四將軍衆十萬征南越。嚴爲戈船將軍。出零陵。下灘水。甲爲下瀨將軍。下蒼梧。嚴善將兵。而甲苛急。衆未得前。伏波將軍路博德。樓船將軍楊僕。已平南越。開九郡。當是時。東越亦反。詔嚴與甲。卽以越侯兵出。若邪白沙。元封元年冬。咸入東越。東越平。二人不加封。以前逗遛故。先是韓安國坐法抵罪。田甲獄吏也。奉使至蒙。讞辱安國。安國曰。死灰獨不復然乎。甲曰。然。卽溺之。居無幾。梁內史缺。漢使使者拜安國爲梁內史。起徙中爲二千石。甲亡。安國曰。甲不就官。我滅而宗。甲肉祖謝。安國笑曰。可溺矣。公等足與治乎。卒善遇之。據史記。漢書。顏師古五行志注。荀悅漢

紀參

何遺

何遺、越人歸漢者也。為馳義侯。元鼎五年秋伐呂嘉時。受詔別將巴蜀罪人。發夜郎下牂牁江。會番禺。因犍為發南夷兵。為且蘭夷會隔滇道。故兵未下。南粵已平。帝便令遺征西南夷。中郎將郭昌衛廣引兵誅且蘭平之。開置五郡。亦以前稽不封。據史記。漢書參修。

畢取

史定居翁黃同轅終古多軍韓說劉福附

畢取、粵人。南粵建德時為郎。相呂嘉以建德反。漢令江淮以南十萬師討之。樓船將軍楊僕師至番禺東。南。伏波將軍路博德師居城西北。取將粵兵出戰。會暮。樓船力攻燒敵。伏波縱令相招。於是取以軍降。封為廉侯。食五百一十戶。同時降者。揚陽。史定為安道侯。粵桂林監居翁諭下。甌駱四十餘萬為湘城侯。又元封初。漢師入東粵。故甌駱左將黃同。斬西于王為下。鄜侯。軍卒轅終古。斬枸北將軍為菑兒侯。東粵將多軍為無錫侯。橫海將軍韓說為案道侯。橫海校尉劉福為繚嫫侯。皆粵人。據史記。漢書參修。

都稽

都稽、粵郎也。元封六年冬。伏波樓船二將軍討南越。縱火燒城。伏波為營以待降者。樓船力攻。反。毆而入。伏波營。遲旦。城中皆降。呂嘉建德夜與其屬數百人亡入海。伏波問降者。知嘉所之。遣人追稽。知嘉必東走高昌。得之。為臨蔡侯。伏波校司馬蘇宏得建德。封海常侯云。據史記。漢書參修。



嚴助

嚴助、會稽人。嚴忌夫子子也。郡舉賢良。對策百餘人。武帝善助對。繇是獨擇助爲中大夫。是時征伐西夷。開置邊郡。軍旅數發。內改制度。朝廷多事。屢舉賢良文學。公孫宏起徒步至丞相。開東閣。延賢人。與謀議。朝覲奏事。因言國家便宜。上令助等與大臣辨論。中外相應。以義理之文。大臣數詘。其尤親幸者。東方朔。枚臯。嚴助。吾邱壽王。司馬相如。相如常稱疾避事。朔臯不根持論。上頗俳優畜之。唯助與壽王見任用。而助最先進。閩越兵圍東甌。東甌告急於漢。大尉田蚡以爲越人相攻擊。其常事。不足煩中國救也。於是助詰蚡曰。特患力不能拔。德不能覆。誠能何故棄之。且秦舉咸陽而棄何。但越今小國。以窮困來告急。天子不振。又何以子萬國乎。上曰。大尉不足與計。吾新卽位。不欲出虎符發兵。郡國適遣助以節發會稽兵。會稽守距不欲發。助乃斬一司馬。諭意指。遂發兵。浮海救東甌。未至。閩越引兵罷。後三歲。閩粵復興兵擊南越。南越守天子約。不敢擅發兵。上書以聞。上多其義。遣兩將軍大發兵。誅閩越。淮南王安書請止兵。而漢兵已出。陰嶺。會閩越王弟餘善殺王降漢。兵罷。上嘉淮南之意。令助諭風指於南越。南越王遣太子隨助入侍。助還。又令諭淮南王告越事。助由是與淮南王相結而還。上大說。助欲守會稽。上拜爲會稽太守。數年不聞問。賜書曰。制詔會稽太守。君厭承明之廬。勞侍從之事。懷故土。出爲郡吏。會稽東接於海。南近諸越。北枕大江。間者。闕焉久不聞問。具以春秋對。毋以蘇秦縱橫。助惶恐上書謝。願奉三年計最。詔許。因留侍中。有奇異輒使爲文。及作賦頌數十篇。及淮南王反。與助相連。廷尉張湯論誅之。竟棄市。

按史記。漢書參修。

朱買臣

朱買臣字翁子。會稽吳人也。家貧讀書。不治產業。常刈薪樵。賣以給食。擔束薪行。且誦書。妻亦負戴相隨。數止買臣毋歌謳道中。買臣愈益疾歌。妻羞之求去。買臣不能留。卽聽去。買臣獨行歌道中。負薪墓間。故妻與夫家俱上冢。見買臣饑寒。呼飯飲之。數歲買臣隨上計吏爲卒。將重車至長安。詣闕上書。書久不報。待詔公車糧用乏。上計吏卒更乞匄之。會邑子嚴助貴幸。薦買臣。召見說春秋。言楚辭。帝甚說之。拜買臣爲中大夫。與嚴助俱侍中。後坐事免。久之召待詔。時東越數反覆。買臣因言東越王居保泉山。更徙處大澤中。今發兵浮海直指泉山。陳舟列兵。席卷南行。可破滅也。上拜買臣會稽太守。謂買臣曰。富貴不歸故鄉。如衣繡夜行。今子何如。買臣頓首辭謝。遂乘傳去。會稽聞太守且至。發民除道。縣吏送迎。車馬百餘乘。人吳界見其故妻。妻夫治道。買臣呼令後車載其夫妻。太守舍置園中。給食一月。妻自經死。買臣於郡治樓船。備糧食水戰具。須詔書到。軍與俱進。居歲餘。買臣受詔將兵。與橫海將軍韓說等。俱擊破東粵有功。徵入爲主爵都尉。列於九卿。坐法免。復爲丞相長史。始買臣與嚴助俱侍中。貴用事。張湯尙爲小吏。趨走買臣等前。迨湯以廷尉治淮南獄。排陷嚴助。買臣怨湯。及買臣爲長史。湯爲御史大夫。行丞相事。知買臣素貴。故陵折之。買臣見湯坐牀上。弗爲禮。買臣深怨。嘗欲死之。遂發湯陰事。湯自殺。上亦誅買臣。買臣子山拊官至郡守。右扶風。據漢書。宋會稽志參修。

鄧忠

鄧宓，粵之番禺人，有謀略，權勇。武帝元狩末，交趾部刺史羅宏舉宓茂才，爲屬國都尉，尋爲南海郡丞。至日南太守，善於柔遠，民夷懷之。卒，葬馬鞍山。後建武中，馬援南征交趾，徵側徵貳，駐兵南海，開拓土宇。至此每風雨晦冥，聞人馬之聲，趾之得宓墓。據黃恭交廣記廣州舊志參修。

### 孫豹

孫豹，會稽人。父幸，武帝末爲珠厓太守，調廣幅布，獻之。蠻不堪役，攻郡殺幸。豹合率善人，還復破之。自領郡事，討擊餘黨，連年乃平。豹遣使封還印綬，上書言狀。制詔卽以豹爲珠厓太守，威政大行。獻命歲至。後漢書南蠻傳瓊志參修。

### 吳霸

吳霸，字子公，陽山人。少以材勇爲兵，率中宿滙浦關，嘗禦侮至滇陽，招徠流徙，民感其仁，姓所駐山曰吳山。云後徙廣鬱都尉，威聞夜郎，遷牂牁太守。爲夜郎竹王立後，天子從其請，由是蠻裔畢服。昭帝元鳳五年秋，罷象郡，分屬鬱林牂牁。霸族在桂陽者，欲往廣鬱，就腴田，霸不許，惟令墾近土，廬居番禺之西，有江浦焉。民服其不私。五世孫雄，官光祿勳。桓帝元嘉元年爲司徒。永興元年罷。據沈懷遠南越志遑川志參修。

### 鄭吉

鄭吉，會稽人也。以卒伍從軍，數出西域，由是爲郎。吉彊執習外國事，自張騫通西域，李廣利征伐之後，初置校尉，屯田渠黎。至宣帝時，吉以侍郎田渠黎，積穀，因發諸國兵，攻破車師，遷衛司馬，使護鄯善以西南。

道神爵中。匈奴乖亂。日逐王先賢。揮欲降漢。使人與吉相聞。吉發渠黎龜茲諸國五萬人。迎日逐王。口萬二千人。小王將十二人。隨吉至河曲。頗有亡者。吉追斬之。遂將詣京師。漢封日逐王為歸德侯。吉既破車師。降日逐。威震西域。遂并護車師。以西北道。故號都護。都護之置。自吉始焉。上嘉其功效。下詔封吉為安遠侯。食邑千戶。吉於是中西域而立幕府。治烏壘城。鎮撫諸國。漢之號令。班西域矣。據張季直出。班固漢書西域傳參修。

何丹

何丹。字伯護。滇陽人。成帝鴻嘉初。鄉里舉茂才。為合滄長。累遷中散大夫。以言忤王莽。出為松滋令。慈祥豈弟。愛民如子。有嘉禾連穎之瑞。及卒於官。邑人哀慟。擇河西勝地葬之。歲六月二日。民醉奠不絕。據湘州記

楚記詔州  
圖經參修。

梅福

梅福。字子真。九江壽春人也。少學長安。明尚書。穀梁春秋。為郡文學。補南昌尉。後歸壽春。數因縣道上言變事。求假軺傳。詣行在所。條對急政。成帝時。大將軍王鳳專勢擅朝。京兆尹王章素忠直。譏刺鳳。為風所誅。王氏浸盛。災異數見。羣臣莫敢正言。福上書不納。帝久亡繼嗣。福以為宜建三統。封孔子之世。以為殷後。又上書言之。綏和二年。立二王後。推迹古文。以左氏穀梁世本禮記相明。遂下詔封孔子世為殷紹嘉公。語在成紀。是時福居家。常以讀書養性為事。至元始中。王莽專政。福一朝棄妻子去九江。至今傳以為仙。其後人有見福於會稽。變姓名為吳市門卒云。據荀悅漢紀。班固漢書參修。

# 百越先賢志卷二

嚴光

嚴光字子陵，一名遵，會稽餘姚人也。少有高名，同光武遊學。光武卽位，乃變名姓，隱身不見。帝思其賢，令物色訪之。齊國上言有一男子披羊裘釣澤中，帝疑光也，遣安車元纁聘之。三反而後至，舍於北軍，給床褥。大官朝夕進膳，司徒侯霸與光素舊，使西曹屬侯子道奉書，願屈語言。光不起，床上箕踞抱膝，發書問子道曰：君房素癡，今爲三公，甯小差否？子道曰：位已鼎足，不癡也。光曰：遣卿來何言？子道傳霸言，光曰：卿言不癡，是非癡語耶？天子徵我，三乃來，人主尙不見，當見人臣乎？子道求報，光曰：我手不能書，乃投札口授曰：君房足下，位至鼎足，甚善，懷仁輔義，天下悅，阿諛順旨，要領絕，霸封奏其書，帝笑曰：狂奴故態也。車駕卽日幸其館，光臥不起，帝卽臥所撫其腹曰：咄咄子陵，不可相助爲理耶？光又眠不應，良久乃張目，熟視曰：昔唐堯著德，巢父洗耳，士故有志，何至相迫乎？帝曰：我竟不能下汝耶？於是升輿歎息而去。復引光入道，舊故從容問光曰：朕何如昔時？對曰：陛下差增於往，因共偃臥，光以足加帝腹，明日太史奏客星犯御坐，甚急，帝笑曰：朕故人嚴子陵共臥耳，除爲諫議大夫，不屈，乃耕於富春山。後人名其釣處爲嚴陵瀨焉。建武十七年，復特徵不至，年八十，終於家，帝傷之，詔下郡縣，賜錢百萬，穀千斛。

據後漢書·皇甫謐高士傳參修。

陳元

陳元字長孫蒼梧封川人父欽習左氏春秋事黎陽賈護與劉歆同時而別自名家曰陳氏春秋王莽從歆受左氏學以欽爲厭難將軍元少傳父業爲之訓詁銳精覃思至不與鄉里通以父任爲郎建武初元與桓譚杜林鄭興俱爲學者所宗時議欲立左氏傳博士范升奏以爲左氏淺末不宜立元聞之詣闕上疏曰陛下撥亂反正文武並用深愍經藝謬雜每臨朝輒延羣臣講論聖道知邱明至賢親受孔子而公羊穀梁傳聞于後世故詔立左氏博詢可否盡之羣下也今論者沈溺所習翫守舊聞固執虛言傳授之辭以非親見實事之道左氏孤學少與遂爲異家之所覆冒夫至音不合衆聽故伯牙絕弦至寶不同衆好故卞和泣血仲尼聖德而不容於世況於竹帛餘文其爲雷同者所排固其宜也非陛下至明孰能察之臣元竊見升等又曰先帝不以左氏爲經故不置博士後主所宜因襲臣愚以爲若先帝所行而後主必行者則盤庚不當遷於殷周公不當營洛邑陛下不當都山東也往者孝武皇帝好公羊衛太子好穀梁有詔詔太子受公羊不得受穀梁孝宣皇帝在人間時衛太子好穀梁於是獨學之及卽位爲石渠論而穀梁氏興至今與公羊竝存此先帝後帝各有所立不必其相因也方今干戈少弭戎事略戢留思聖藝眷顧儒雅分明白黑建立左氏解釋先聖之積結洮汰學者之累惑使基業垂於萬世後進無復狐疑則天下幸甚書奏下其議范升復與元辨難凡十餘上帝卒立左氏學元以才高著名辟司空李通府時大司農江馮上言宜令司隸校尉督察三公事下三府元疏論不宜使有司察公輔帝從之李通罷元復辟司徒歐陽歆府數陳當世事郊廟之禮帝不能用以病去年老卒於家

據後漢書文選參修

沈豐

沈豐字聖通。會稽烏程人。永平中。為郡主簿。遷零陵太守。為政慎刑重法。罪人詞訟。初不歷獄。嫌疑不決。一斷於口。鞭扑不舉。市無刑戮。僚友有過。亦不暴揚。有善必述。曰。太守所不及也。在官七年。建初間。有紫芝甘露之瑞。論者以為皆豐治化之應也。據會稽典錄。楚紀參修。

顧奉公孫松董子儀朱俊附

顧奉。公孫松。俱會稽處士。有行誼。蜀郡張霸。永元中。為會稽太守。表薦之。奉為潁川太守。松為司隸校尉。並有名稱。其諸有行業者。皆見擢用。郡中爭厲志節。習經者以千數。道路但聞誦聲。先是郡有高士董子儀。會稽都尉任延敬待以師友之禮。是以郡中賢士大夫。爭往官焉。上虞朱俊。亦明經舉孝廉。蓋與奉松先後表著者也。據東觀漢記。後漢書參修。

陳囂

陳囂字子公。山陰人。囂與紀伯為鄰。伯竊囂藩地。自益。囂不校。益徙地與之。伯慚懼。歸所侵地。囂辭不受。遂為大路。鄉里上其事。刺史行部。異囂問之。囂曰。鄰自有地。囂無所讓路也。刺史表其里曰風義鄉。據英賢傳。會稽典錄參修。

鄭宏

鄭宏字巨君。會稽山陰人也。少為鄉嗇夫。太守第五倫行春。見而深奇之。召署督郵。舉孝廉。宏師同郡河

東太守焦贛。楚王英謀反發覺。疏引及贛。贛被收捕。疾病道亡。妻子閉繫。詔獄考掠連年。諸生故人懼相連及。皆變姓名以逃禍。宏獨髡頭負鉄鎖詣闕上章。為贛訟罪。顯宗覺悟。赦其家屬。宏躬送其喪。及妻子還鄉里。繇是顯名。拜為騎令。遷淮陰太守。消息繇賦政不煩苛。行春大旱。隨車而雨。白鹿方道夾轂而行。建初初。四遷為尚書令。舊制尚書郎限滿。補縣長令。史丞尉。宏奏以為臺職雖尊。而酬賞甚薄。至於開選。多無樂者。請使郎補千石令。史為長。帝從其議。宏前後所陳。有補益王政者。皆著之南宮。以為故事。出為平原相。徵拜侍中。建初八年。代鄭衆為大司農。舊交趾七郡。貢獻轉運。皆從東治汎海而至。風波艱阻。沈溺相係。宏奏開零陵桂陽嶠道。於是夷通途為常路。在職二年。省三億萬計。永和元年。代鄧彪為太尉。奏尚書張林阿附竇憲。帝詰讓。宏因乞骸骨。病卒。敕褐巾布衣。素棺殮殮。以還鄉里。據袁宏後漢紀。謝承范曄後漢書修。

蔡倫

蔡倫。字敬仲。桂陽人也。永平末。給事宮掖。建初中。為小黃門。和帝即位。轉中常侍。豫參帷幄。倫有才學。盡心敦慎。數犯嚴顏。匡弼得失。每休沐。輒閉門絕賓。暴體田野。後加尚方令。永元九年。監作祕劍及諸器械。莫不精工堅密。為後世法。自古書契多編竹簡。其用縑帛者。謂之紙。縑貴而簡重。不便于人。倫乃造意。用樹膚麻頭及敝布魚網。以為紙。元興初。奏上。帝善其能。天下咸稱蔡侯紙。元初元年。鄧太后以倫久在宿衛。封為龍亭侯。邑五百戶。後為長樂太僕。四年。帝以經傳之文。多不正定。乃選通儒。謁者劉珍及博士良史詣東觀。各讐校漢家法令。倫監典其事。據東觀漢紀。後漢書水經注參修。



王充

王充字仲任，會稽上虞人。師事班彪，好博覽而不守章句。家貧無書，嘗遊洛陽書肆，閱所賣書，一見輒能記憶。肅宗時，詔公車徵，病不行。嘗著論衡八十五篇，二十餘萬言，釋物類同異，正時俗嫌疑。蔡邕入吳，得其書，帳中祕玩，以爲談助。王朗守會稽，持還許下，人稱其才進。充年漸七十，志力衰耗，乃造養性書十六篇，裁節嗜欲，頤神自守。永元中卒。據袁松謝承後漢書·抱樸子參修。

楊孚

楊孚字孝元，南海人。章帝朝，舉賢良，對策上第，拜議郎。和帝卽位，用兵匈奴，孚奏言創造用武，守業尙文，故周勝殷，則有載戢干戈之頌。太宗息兵，嘗言自勝衣冠，念不及兵，先帝繼述，虜來則應，未嘗先伐。故孝章之謚，追配孝文。詩曰：允文允武，克開厥後。又曰：倬彼雲漢，爲章于天。二帝之謂也。願陛下繩美祖宗，毋輕用武。永元十二年，旱災，令在廷議政令得失。孚曰：漢制郡國之士，誦孝經，察其志行，選舉孝廉。故帝謚必稱孝者，躬行化率也。王莽不服母喪，天下誅之。然今時公卿大夫，罹父母憂，不得去位，而黎萌孝悌力田，反得爵級，非所以爲民表儀也。且郡邑侵漁，不知紀極，貨賂通于上下，治道衰矣。宜詔中外臣民，均行三年通喪，而吏治必務廉平，以勸選舉之士。庶幾克誠小民，副承天意。帝從其議，詔禁有司假勢行邪，其巧法析律，飾文增辭，貨行於言，罪戾乎手者，重罪之。賜天下男子爲後者爵二級，三老孝悌力田三級。鰥寡孤獨篤疾不能自存者，粟人三斛。時南海屬交趾部，刺史夏則巡行封部，冬則還奏天府，舉刺不法。

其後競事珍獻。孚乃枚舉物性，霧悟指為異品，以諷切之。著為南裔異物志。自後羅浮瑋珉之屬，日絕時，謂能通神明。孚家江濟北岸，嘗移洛陽松柏，種植宅前。隆冬蜚雪盈樹，人因目其所嚮為河南。或問其故，孚曰：「偶然耳。」草木豈能動天哉？後為臨海太守，復著臨海水土記。世服孚高識，不徒博雅。據前略袁宏後漢書文類聚·初學記·吳鏡三才廣記參修·黃恭交廣記·滄

### 張重

張重，字仲篤，合浦人。篤學善言，為嶺表望士。刺史推擇為日南郡從事，上計入洛。明帝訝其么麼，問之曰：「何郡小吏？」重抗聲對曰：「臣日南計吏，非小吏也。」陛下欲得其才邪？抑將稱骨度肉也？帝善其對。正旦大會，帝問曰：「日南郡北向視日耶？」重對曰：「郡有雲中金城，不必皆有其實。日南日亦俱出於東爾。至於風氣暄暖，日影仰當，官民居止，隨情面向。東西南北，迴背無定。所謂日域在南者也。」帝益善之，賜以金帛。自此上計召對，皆有賞焉。據范泰古今善言·太平御覽·水經注參修·

### 養奮

養奮，字叔高，鬱林人。博通墳籍，以布衣舉方正。和帝策問陰陽不和，或水或旱。奮對曰：「天有陰陽，陰陽有四時。四時有正令，春夏則予惠，布施寬仁；秋冬則剛，盛威行刑，賞罰殺生，各應其時。則陰陽和，四時調。風雨時，五穀升。今則不然，長吏多不奉行時令，為正舉事，干逆天氣，上不恤下，下不忠上。百姓困乏而不恤，衆怨鬱積，故陰陽不和，風雨不時。災害緣類，水者陰盛，小人居位，依公營私，讒言誦上，雨漫溢者，五穀有

不升而賦稅不爲減。百姓虛竭。家有愁心也。奮蓋一時名儒云。據姓纂。風俗通。氏族博考。通志略參修。

### 包咸

包咸字子良。會稽曲阿人也。少爲諸生。受業長安。師事博士右師細君。習魯詩論語。光武初。太守黃鵬署戶曹史。舉孝廉。除郎中。建武中。入授皇太子論語。拜諫議大夫。侍中右中郎將。永平五年。遷大鴻臚。每進見。賜以几杖。經傳有疑。輒遣小黃門就舍。卽問。顯宗以咸有師傅恩。而素清苦。特賜珍玩采帛。奉祿增於諸卿。咸皆散與諸生之貧者。病篤。帝臨視。卒於官。子福拜郎中。亦以論語入授。和帝據實錄謝承後漢書參修。

### 鄧盛

鄧盛字伯直。蒼梧人。仕爲秭歸令。聞母病。解印綬去。及歸。母果亡。居喪盡孝友。尉馬日磾嘉其行。履服竟卽辟之。初入府爲主簿。尋爲太尉諸曹掾。時彭城相左尚以賊獲罪。三府掾屬拷驗。踰年不竟。更選盛覆拷。盛至獄。洗沐尙。解械賜席。乃謂尙曰。君受國重恩。而所坐如此。今遇君子。不可以小人相待。盛感至意。對曰。今使君相待以禮。尙獨何心。不以死相歸乎。卽引筆具對。時人語曰。淑問得竟。臯陶鄧盛。公卿而下。皆禮重之。據交廣記萬姓譜參修。

### 楊扶子喬璇附

楊扶字聖儀。會稽烏傷人。其先河東人也。和帝永元中。扶以薦辟爲武源令。遷交趾刺史。有理能名。洞民羣黨劫略。督郵往捕。反爲所傷。扶益兵縛之。縱使就粟南海。行二日。盡投江中。有瞽嫗市物。泉刀盡失。訟

諸扶扶密得所遺子嫗。州人爲之謠曰：楊聖儀，政多奇，蓋此類也。生二子，長喬爲尙書，容儀偉麗，數上言政事。桓帝愛其才貌，詔妻以公主。喬固辭不聽，遂不食死。次璇舉孝廉，靈帝時爲零陵太守。時蒼梧桂陽賊攻郡縣，璇制馬車囊灰繫布馬尾，順風鼓灰，以火燒布，馬驚奔突，弓弩亂發，鉦鼓鳴震，賊駭破散，梟其渠帥。郡境以清，詔拜議郎。三遷爲南海太守，所在有異政。尙書令張溫特表薦之，徵拜尙書僕射。乞骸卒於家。據後漢書·浦江人物志參修。

鍾離意

鍾離意，字子阿，會稽山陰人也。少爲郡督郵，舉孝廉，辟大司徒侯霸府，詔部送徙詣河內。冬寒，徒病，過宏農，意輒移屬縣，使作徒衣，縣不得已與之。而上書言狀，意亦具以聞。光武得奏，以見霸曰：君所使掾，何乃仁於用心，誠良吏也。意於道解徒桎梏，尅期俱至，除瑕邱令。吏有擅建者，盜竊縣內，意問狀服罪，不忍加刑，遣建長休。建父設酒，令建進藥而死。遷堂邑令，縣人防廣爲父報讐，繫獄。母死，廣哭泣不食，意憐傷之，聽廣歸家，殯斂訖，入獄。意密以狀聞，廣減死論。顯宗徵爲尙書，交趾太守張恢坐賊服法，資物簿入，大司農詔班賜琴，臣意得珠璣，悉委地而不拜。賜，帝怪問故，對曰：臣聞孔子忍渴於盜泉之水，曾參回車於勝母之間，惡其名也。此賊穢之寶，誠不敢拜。帝嗟嘆曰：清乎尙書之言，乃更賜庫錢三十萬，轉尙書僕射。車駕數幸廣成苑，意當車陳諫，般樂遊田之事。天子卽時還宮。永平三年夏旱，而大起北宮，意詣闕免冠上疏，帝策詔意冠履分布禱雨，敕大匠止作諸宮，減省不急，遂應時澍雨焉。特詔賜降胡子緘，尙書案事，誤

十爲百。帝見司農上簿，大怒，召郎將笞之。意入叩頭曰：「過誤之失，常人所容。若以懈慢爲愆，則臣位大罪重。郎位小罪輕，咎皆在臣。」乃解衣就格。帝意解，使復冠而貰郎。會連有變異，意復上疏切諫。帝雖不能用，然知其至誠，亦以此不得久留，出爲魯相。到官，出私錢萬三千付戶曹孔訢，修夫子車，身入廟，扶几席，劍履後德陽殿成。百官大會，帝謂公卿曰：「鍾離尙書若在此殿，不立意令瑕邱堂邑及相魯五年，愛利爲化，輕刑慎罰，拊循百姓，人多殷富，以久病卒官，詔賜錢一十萬。」據東觀紀·後漢書·孔庭纂要參修。

### 許荆

許荆，字少張，會稽陽羨人。少爲郡掾，嘗拯兄子世於難。太守黃競舉孝廉，和帝時遷桂陽太守。郡濱南州，風俗脆薄，荆爲設喪紀婚姻制度，使知禮禁，嘗行春來陽，蔣均兄弟爭財，互相言訟，荆對之歎曰：「吾荷國重任，而教化不行，咎在太守。」顧使吏上書陳狀，欲詣廷尉，均兄弟咸悔吝，求受罪。郴人謝宏等不養父母，兄弟分析，因此皆還供養者千餘人。在事十二年，父老稱歌，以病上徵，拜諫議大夫，卒於官。桂陽人爲立廟樹碑。據謝承袁宏後漢書參修。

### 招猛

招猛，南海人，舉茂才爲郎。元初中，官大鴻臚卿，掌諸侯及四方歸義蠻夷與郡國上計，而諸王入朝拜諸侯嗣子禮儀皆屬焉。猛善於其職，動無違禮。四夷重譯，若高句驪、馬韓、元菟、南夷，初附及就封入覲者，至容臺肆儀行事，猛舉制詔眎之，悉慝其情云。據東觀記·玉海·姓范參修。

蔡毋俊

蔡毋俊，會稽上虞人也。少治左氏春秋。永初中，舉孝廉，拜左校令。出為交趾刺史。元初三年，合浦蠻夷反，遣侍御史任連督州郡兵討之。俊保障蒼梧，乃往戎行，所向摧靡，功當封賞。上書歸功命使，自謂致寇當誅。安帝下詔美之。其後同郡虞翻稱俊拔濟一郡，讓爵士之封，謂此也。據交廣記·會稽典錄·吳志參修。

陳臨

陳臨，字子然，南海人也。家居海上，蠻俗荒陋，臨學覽經典，行誼卓然。郡舉孝廉。永建中，官至蒼梧太守，推誠而理，導民孝悌，民有遺腹子，為父報讐殺人，吏所捕獲，臨知其無嗣，令其妻侍獄中。後產一子，郡人歌曰：蒼梧府君恩廣大，能令死囚有後代。德參古賢，天報施。建安中，徵為廷尉，郡每以五月五日，祠臨東城門上，令小童潔服舞之。據太平御覽為善陰鸞參修。

李進

李進，字子賢，高興人。世農家，進獨明悟，誦通經傳，力耕時，嘗有一雞，毛色五彩，倏然而來。及去，莫知所往。以其無主，目為客雞。云是年禾稼大熟，進得補郡功曹，累遷騎都尉。永和二年，荆蠻反叛，遣進為武陵太守。帥兵往討，大破之。進簡選將吏，得其情和。在郡九年，梁太后臨朝，下詔增進秩二千石，賜錢二十萬。中平間，代賈琮為交趾刺史，奏請依中州例貢士。後阮琴以茂才仕至司隸校尉，交趾人材得與中州同選。實自進始。其子孫蕃衍，布在交廣，多仕至大官。高興人遂以客雞為祥。比諸陳寶焉。據黃恭交廣記·後漢書·太平御覽參修。

龍邱萇

龍邱萇，太末人。隱居山中，志不降辱。王莽時，連辟不至。更始初，任延爲會稽都尉，掾吏白請召萇。延曰：「龍邱先生，躬德履義，有伯夷原憲之節。遣功曹奉謁，修書記，致醫藥，使者相望於道。歲餘，乃詣府。拜議曹祭酒。其隱居九石特秀，林木色丹如蓮花。復有巖穴如牕牖，中有石床。因萇曰龍邱山云。」

據後漢書·風俗通·陳陽記參修。





# 百越先賢志卷三

徐栩

徐栩字敬卿。會稽由拳人。少爲獄吏。執法詳明。遷小黃令。時陳留遭蝗。野無遺草。小黃飛逝不集。刺史行部。奏栩他事。栩去官。蝗卽日至。刺史媿謝。令還邑。蝗卽去。後爲長沙太守。據孔曄會稽紀參修。

澹臺敬伯高彪附

澹臺敬伯。會稽人。受韋氏詩於淮陽薛漢。當時言詩者。推漢爲長。敬伯與韃爲杜撫。鉅鹿韓伯高爲弟子。最知名。又無錫高彪。常訪馬融。覆刺遺書。及餞督軍御史第五永作箴一篇。議郎蔡邕等美其文。以爲莫尙也。據范曄後漢書。漢雜事。世說新語參修。

劉熙

劉熙字成國。交州人。先北海人也。博覽多識。名重一時。薦辟不就。避地交州。人謂之徵士。往來蒼梧南海。客授生徒數百人。乃卽名物以釋義。惟揆事源。致意精微。作釋名二十七篇。自爲之序。又著諡法三卷。皆行于世。建安末。卒於交州崇山下。有劉熙墓云。據交廣春秋。文獻通考參修。

孟嘗

孟嘗字伯周。會稽上虞人也。少修操行。仕郡爲戶曹史。上虞有寡婦。至孝養姑。姑壽終。夫女弟先懷嫌忌。

誣婦厭苦供養。加鳩其母。列訟縣庭。郡不加察。結竟其罪。嘗先知枉狀。言之太守。太守不爲理。嘗謝病去。婦竟冤死。自是郡中連旱二年。太守殷丹到官。訪問其故。嘗詣府具陳寡婦冤誣之事。因曰。昔東海孝婦。感天致旱。于公一言。甘澤時降。宜戮訟者以謝冤魂。庶幽枉獲伸。時雨可期。丹從之。刑訟女而祭婦墓。天果雨。穀稼以登。嘗後策孝廉。舉茂才。拜徐令。遷合浦太守。郡不產穀。而海出珠。與交趾比境。通商販買糧食。先時守宰並貪穢。詭人探求。珠漸徙於交趾郡界。行旅不至。貧者死餓於道。嘗革易前敝。求民病利。不踰歲。去珠復還。商貨流通。百姓賴焉。被徵當還。吏民攀請。車不得進。乃載民船夜遁。去隱窮澤。身自耕傭。鄰縣士人慕其德。就居止者百餘家。桓帝時。尚書同郡楊喬上書薦之。竟不見用。卒於家。據謝承范曄後漢書參修。

### 黃昌

黃昌字聖真。會稽餘姚人。家本孤微。居近學宮。數見諸生修庠序之禮。因就經學。又曉習文法。仕郡爲決曹。刺史行部。見昌奇之。辟從事。後拜宛令。好發奸伏。人有盜其車蓋者。密遣親客至門下。賊曹家掩得之。悉收其家。一時殺戮。大姓戰懼。皆稱神明。朝廷舉能。遷蜀郡太守。先太守李根老多悖政。百姓侵冤。及昌到。吏人訟者七百。悉爲斷理。莫不得所。密捕盜師一人。脅使條諸縣強暴之人姓名居處。乃分遣掩討。無有遺脫。宿惡大姦。皆奔走他境。視事四年。遷陳相。遷河內太守。永和五年。徵拜將作大匠。漢安元年。補大司農。左轉大中大夫。卒。據後漢書。蜀大紀參修。

### 彭修

彭修字子陽，會稽毗陵人。年十五，父爲郡吏，得休與修俱歸。道爲盜所劫，修拔佩刀前持盜帥曰：父辱子死，卿不願死耶？盜相謂曰：此童子義士也，辭謝而去。鄉黨稱其名。後仕郡爲功曹，西部都尉宰蠹行太守事，以微過收吳縣獄吏，將殺之。主簿鍾離意爭諫甚切，蠹怒縛意欲案之。掾吏莫敢諫，修排闥入拜於庭曰：昔任座面折文侯，朱雲攀毀欄檻，自非賢君安得忠臣？今慶明府有任座朱雲也，疑遂原意，罰貫獄吏罪。州因辟從事。時賊張子林等作亂，郡請修守吳，令修與太守出討賊。賊飛矢雨集，修障扞太守，而爲流矢所中死。太守得全，賊素聞其恩信，卽殺弩中修者，餘卽降散。曰：自爲彭君故降，不爲太守服也。據後漢書萬姓

### 魏朗

魏朗字少英，會稽上虞人。少爲縣吏，兄爲鄉人所殺，朗白日持刃報讐於縣中，遂亡命。到陳國，從博士郗仲信學春秋圖緯，又詣太學受五經。京師長者李膺之徒爭從之。初辟司徒府，遷彭城令。會九真賊起，以薦爲九真都尉，討破羣賊。桓帝美其功，徵拜議郎，遷尙書。屢陳便宜，有所補益，出爲河內太守，政爲三河表。尙書令陳蕃薦朗公忠亮直，宜在機密，復爲尙書，被黨議免。歸家，後竇武誅朗，以黨被急徵，行至牛渚，自殺。著書數篇，號魏子云。據後漢書修

### 徐徵

徐徵字君求，荔浦人。少有方直之行，持守不撓。通書傳，尤明律令。延熹五年，由中郎爲郡督郵，時常侍唐

衡豪橫。京師無所與較。遣賓客至蒼梧。不循法度。徵便收容郡市髡髻。已乃白太守。太守大怒。收徵附獄。主簿守閣懇白曰。此人特強買賣。既侵百姓。又污婦女。徵上念明政。據刑申恥。今不使治郡。便無爪牙之吏。後督郵當徒跣行。奉諸貴戚賓客耳。太守不得已釋之。徵短小而果。世謂智過其軀。居常以日南張重自擬云。據交廣記姓范參修。

申朔

申朔字元游。蒼梧人。性廉慎。常著布襦布袴。不事綺紈。鄉邑歎慕之。舉孝廉。為九真都尉。後擊狂賊有功。民頌其德。據陸胤先賢傳修。

張武

張武者。會稽由拳人也。父業郡門下掾。送太守妻子還鄉里。至河內亭。盜夜劫之。業與賊戰死。亡失屍骸。武年幼。不及識父。後之太學受業。每節常持父遺劍。至亡處祭醞。號泣而還。太守第五倫嘉其行。舉孝廉。遭母喪。過毀。傷父魂靈不返。哀慟絕命。據後漢書修。

陸續子稠。逢真孫康曾孫續。

陸續字智初。會稽吳人也。幼孤。仕郡戶曹史。歲荒民困。太守尹興使續於都亭賦民餽粥。事畢。興問所食幾何。續口說六百餘人。皆分別姓名。無一差謬。興異之。刺史行部見續。辟為別駕從事。病還。為郡門下掾。是時楚王英謀反。陰疏天下善士。楚事覺。顯宗得其錄。有尹興名。徵興詣廷尉獄。續與主簿梁宏。功曹史

驅勳及掾史五百餘人詣洛陽。詔獄就考。諸不堪苦楚死者大半。唯續宏勳掠考五毒。肌肉消爛。終無異辭。續母至京師。覘候消息。獄事持急。無緣相聞。但作饋食付門卒。以進。續對食悲泣。不能自勝。使者怪問其故。續曰。母來不得相見。故泣耳。使者怒。召門卒。將案之。續曰。因食餉。獲識母所自調和。故知來耳。非人告也。使者問何以知母所作。續曰。母截肉未嘗不方。斷葱以寸爲度。是以知之。使者問諸謁舍。續母果來。於是上書說續行狀。帝卽赦興等事。還鄉里。禁錮。續老病終。長子稠。廣陵太守。中子逢。樂安太守。少子褒。連徵不就。褒子康。武陵太守。轉桂陽。樂安。徵拜議郎。出爲廬江太守。獻帝時。天下大亂。臨終。屈指庚子歲。天下鼎分。謂少子績曰。從今以後六十年。車同軌。書同文。晉太康平吳。蓋其家傳象數云。按後漢書水經注參修。

### 戴就

戴就。會稽上虞人。仕郡倉曹掾。揚州刺史歐陽參。奏太守成公浮臧罪。遣部從事薛安案倉庫簿領。收就於錢塘縣獄。幽囚考掠。五毒參至。就慷慨直辭。色不變容。又燒鋏斧。使挾於肘腋。覆船下。薰以馬通。以大鍼刺指爪。爪悉墮落。主者以狀白安。安呼見。就謂曰。太守罪穢狼籍。受命考實。君何故以骨肉扞扞耶。就據地答言。太守剖符大臣。當以死報國。卿雖銜命。固宜申斷冤毒。奈何誣枉忠良。強相掠理。令臣謗其君子。證其父薛安庸駭。忤行無義。就考死之日。當白之於天。與羣鬼殺汝於亭中。如蒙生全。當手刃相裂。安深奇其壯節。解械美談。表其言辭。解釋郡事。徵浮還京師。免歸鄉里。太守劉寵舉就孝廉。光祿主事。據後漢書

• 風俗通  
參修

唐珍

唐珍字惠伯桂陽人幼聞讀書即能記誦天性恬漠寡欲荆州刺史度尙甚稱重之及就辟召累官太常  
熹平二年代楊賜爲司空嘗奏請沿海立堠戍以防夷寇天子不從自言先世家本潁川大父南徙已居  
三世同族有中常侍衡與左悺等竊弄威福衡常呼珍爲弟珍恥之然衡有弟方爲京兆虎牙都尉珍謂  
所親曰彼已有虎牙弟又奚用弟我爲耶自是陽瘖不復出言遂以久病罷歸素師事郴人成武丁得黃  
老養性之術閉戶呼吸元牝人罕接焉光和二年卒鄉人屢見其出入山水間立廟祀之號唐司空廟據

平御覽·人代紀要·潁川志·遑川志參修·

朱儻

朱儻字公偉會稽上虞人也少孤以孝養名好義輕財用母繒帛爲友人償債母責之儻跪對曰小損當  
大益初貧後富必然理也縣長度尙見而奇之薦於太守章毅後太守尹端以儻爲主簿熹平初端坐討  
賊失利罪應棄市儻羸服到京師賂主章吏遂得刊定州奏免死輸作端喜降免而不知其由儻亦終無  
所言舉孝廉除蘭陵令政有異能爲東海相所表會交趾部羣賊並起牧守輒弱不能禁又交趾賊梁龍  
等萬餘人與南海太守孔芝反叛攻破郡縣光和元年拜儻交趾刺史令過本郡簡募家兵及所調合五  
千人分兩道而入既到州界按甲不前先遣使觀賊虛實宣揚威德以震動其心既而與七郡兵俱進逼  
之遂斬梁龍降者數萬人旬月盡定以功封都亭侯千五百戶賜黃金五十觔徵爲諫議大夫及黃巾起

公卿多薦儻有才略。拜爲右中郎將。與左中郎將皇甫嵩討賊破之。進封西鄉侯。董卓忌之。初平四年。爲太尉錄尙書事。以日食策免。持節鎮關東。長安中亂。留拜大司農郭汜。遂質儻等。儻素剛。卽自發病卒。子皓亦有才行。官至豫章太守。據袁宏後漢紀。范曄後漢書。人代紀要參修。

### 謝夷吾

謝夷吾。字堯卿。會稽山陰人也。少爲郡吏。學風角占候。太守第五倫擢爲督郵。舉孝廉。爲壽張令。稍遷荊州刺史。遷鉅鹿太守。所在愛育人物。有善績。及倫作司徒。令班固爲文薦夷吾曰。臣聞堯登稷契。政隆太平。舜用臯陶。政致雍熙。殷周雖有高宗昌發之君。猶賴傳說呂望之策。故能克崇其業。允協大中。竊見鉅鹿太守會稽謝夷吾。出自東州。厥土塗泥。而英資挺特。奇偉秀出。才兼四科。行包九德。仁足濟時。知周萬物。加以少膺儒雅。韜含六籍。推考星度。綜校圖錄。探蹟聖秘。觀變歷徵。占天知地。與神合契。據其道德。以經王務。昔爲陪隸。與臣從事。奮忠毅之操。躬史魚之節。董臣嚴綱。勗臣懦弱。得以免戾。實賴厥勳。及其應選作宰。惠敷百里。降福彌異。流化若神。爰牧荊州。威行邦國。奉法作政。有周召之風。居儉履約。紹公儀之操。尋功簡能。爲外臺之表。聽聲察實。爲九伯之冠。遷守鉅鹿。政合時雍。德量績謀。有伊呂管晏之任。闡宏道奧。同史蘇京房之倫。雖密勿在公。而身出心隱。不殉名以求譽。不馳騫以要寵。念存遜遁。演志箕山。方之古賢。實有倫序。採之於今。超然絕俗。誠社稷之元龜。大漢之棟甍。宜當拔擢。使登鼎司。上令三辰順軌。於歷象。下使五品咸訓。於嘉時。必致休徵。克昌之慶。非徒循法奉職而已。臣以頑鶩。器非其時。尸祿負乘。

夕惕若厲。願乞骸骨。更授夷吾。上以光七曜之明。下以厭率土之望。庶令微臣。塞咎免悔。夷吾先在荊州。能決斷罪疑。行部到南陽。遇孝章皇帝巡狩。駕幸魯。賜有詔敕。荊州刺史入傳錄。見囚徒戒。長吏勿廢舊儀。朕將覽焉。所決正一縣三百餘事。事與上合。而朝廷嘆息曰。諸州刺史盡如此者。朕不憂天下。常以勵羣臣。其善績著於州郡有如此。據謝承范曄漢書參修。

賀純

賀純。字仲真。會稽人。先慶氏也。少即博極羣藝。十辟公府。三舉賢良。不至。後徵拜議郎。侍中。時避安帝父諱。改姓為賀。數陳災異。上便宜數十事。多見省納。遷江夏太守。徐州牧。齊中書令。邵皆其後也。據會稽典錄元和姓纂參修。

董正

董正。字伯和。番禺人也。少有令姿。耽意術籍。年十五。通毛詩三禮春秋。以學行知名。公府以其有用世才。常詣其廬。疇咨理道。數被辟命。皆不就。熹平末。張角袁術起難。天下亂。正每觀天象。知漢歷之不長。輒掩涕太息。或勸使出仕。歎曰。潛龍以不見為德。君子以藏寶自完。吾惟嫉時。何迺相迫耶。賦性高潔。貧寒不戚。志在規俗。躬耕以足衣食。暇即講詩書。陳禮法。遠近多從之。游鄉閭。或少為不善。必相戒曰。吾伯和得無入於耳否。有不平者。多詣正直之。隱士南陽車遂。聞正令名。不遠千里。徑來投正。正與同志。恩如兄弟。數年中。遂得病。正為傾家救卹。病篤。正呼遂曰。南陽君更有以見屬否。遂瞪視曰。以死累君。言訖而絕。正



爲停柩於堂。殯斂之禮。一視兄弟之喪。躬送喪於南陽而返。粵產素多奇瑰之貨。番禺爲都會。商賈湊集。貿遷易以致富。加以夷獠聚集。習尙輕悍。鬪爭射利。未嘗知學。感正清白。偷俗自爾。日變。建安中正卒。葬番禺之東。衆爲刻碑表曰。有漢徵士董君之墓。過者必式。晉隆和。中南海太守袁宏。追想風采。乃訪求世族。條列行誼。聞于朝。有詔旌表門閭。墓禁樵牧。據南越志。廣州先賢傳。太平御覽。淵穎文集。一統志參修。

### 疎源

疎源字元流。南海人。出給郡役。爲戶曹佐。源性廉潔。家貧。餉晏不至。同舍人餉先至。呼之共食。源未嘗聽。由是知名。後爲尙書郎。習練故事。爲九卿所重。故人有詣源欲通苞苴者。源絕口不答。臨別便與訣曰。子以言污我。從此與君絕矣。曩直遇隆寒。擁敗絮。震掉戰栗。吏獻裘。堅却之。從司徒上書言事。忤權貴得罪。廢于家而卒。據藝文類聚。太平御覽。廣州先賢傳參修。

### 趙曄

趙曄字長君。會稽山陰人。嘗爲縣吏。奉檄迎督郵。曄恥于厮役。遂棄車馬去。到犍爲。資中詣杜撫。受韓詩。究竟其術。積二十年。絕問不還。家爲發喪。制服。曄卒業乃歸。州召補從事。不就。舉有道。卒于家。曄著吳越春秋詩。細歷神淵。蔡邕至會稽。讀詩細而歎息。以爲長於論衡。邕還京傳之。學者咸誦習焉。據謝承范曄後漢書。隋唐經籍志參修。

### 韓說

韓說字叔儒會稽山陰人博通五經尤善圖緯之學舉孝廉與議郎蔡邕友善數陳災眚及奏賦頌連珠  
稍遷侍中光和元年說言於靈帝云晦日必食乞百官嚴裝帝從之果如所言中平二年又上封事尅期  
宮中有災至日南宮大火遷江夏太守公事免年七十卒於家

據謝承范曄後漢書參修

# 百越先賢志卷四

羅威

羅威字德仁番禺人天性惇懇髻髻卽知禮讓八歲喪父哀毀如成人事母至孝勤身苦體以備供養怡顏遜言未嘗迅聲厲色朝暮供侍奇果珍味隨時進前母年七十天寒常身溫席母乃寢夏月必撤帳而臥曰吾留蚊蚋恐去齧母制行雅飭口不挂俚褻之言足不及富貴之門待妻孥如嚴賓先世遺以負郭之田力耕以自給非其力不食也鄰家牛數犯其穡威刈芻潛納其門而去牛主驚怪陰使人廣求乃覺是威感其長者出遇老稚負戴於塗率代其任邑人化之孝慈成俗令異其行辟署門下史威辭不就強之頗力遂偕母遷於增城縣界去還復故居母喪泣血骨立日進溢米食蔬醢者三年旣葬結廬於墓朝夕盡哀白鹿止其墓側馴擾如家所畜世以爲孝感所致威與同邑唐頌篤行齊名王僧孺之爲南海太守也下教求士有曰此境三閩奧壤百粵舊都漢開吳別分星畫部風序泱泱衣簪斯盛其川嶽所產豈直明珠大貝桂蠶翠羽孝實人經則有羅威唐頌學惟業本又聞陳元士雙自是高尙獨往相望於嶼巖懷仁抱義繼跡於前史蓋以廣之多賢由三數公倡之也

據廣州先賢傳藝文類聚謝承後漢書參修

唐頌

唐頌字德雅番禺人奉養以孝聞連遭父母喪摧毀幾至滅性速葬躬負土爲墳於墳左爲小廬覆以苦

茨寢處其中。扶服哭踊。朝夕捧盥進膳。事之如生者。凡六年。有甘露降於冢樹。馨郁霽。彌月不已。人或訪頌。見白鹿拾食廬次。如象畜。咸異之。稱爲唐大孝。頌自是終身衣不純采。非祭不近酒肉。忌日必齋。肅以祭。見父母所遺物。或經父母所歷。輒捧手而泣。人始以爲矯。及察之。恆皆然。而後知其篤行之純。蓋天性也。郡察孝廉。仕爲布山令。布山在鬱林境中。雜以民夷。號難治。頌鋪以太和不事威。擯挫彊。拊柔惠。及孀。民感其仁。無梗化者。後頌卒。民報祀之。南齊永明中。范雲爲廣州刺史。遣使祭孝子羅威。唐頌諸墓。蓋以厲俗也。廣人立祠祀威。頌其祠今不存。據廣州先賢傳。太平御覽。南史參修。

頓琦

頓琦。字孝異。蒼梧人。居母喪。獨身立墳墓。歷年乃成。手種松柏成行。哀毀踰制。感物通靈。有飛鳧白鳩。棲息廬側。見人輒去。見琦而留。南齊永明中。范雲使祭琦及丁密墓。據太平御覽。姓范參修。

丁密

丁密。字靖公。蒼梧人。性清介。非家織布不衣。非己耕種菜果不食。毫髮之饋。不受於人。父喪。廬於墓側。有雙鳧游密廬旁小池。見人馴伏。後遭母喪。復廬三年。歸舊廬一宿。雙鳧復至。遊戲池中。據太平御覽。參修。

顏烏

顏烏。會稽人。事親孝。父亡。負土成墳。羣鳥銜土助之。其吻皆傷。因以名縣。據孔暉會稽記修。

費汎子鳳

費汎，字仲慮，吳興人，以孝廉除郎中屯騎司馬，出爲蕭令，視民如子，先教後罰，爲令九年，百姓移風，惡慝不作，姦寇不生，三歲不斷獄，禎祥感應，時沛有蝗，獨不入界，由此顯名，朝廷嘉之，拜梁相，子鳳，字伯簫，言不失典術，行不廢矩度，漢安二年，吳郡太守東海尹舉鳳孝廉，拜郎中，除陳國新平長，復宰堂邑，鳳退已進弟，不營榮祿，祖業良田，畝直一金，悉與弟息，行義高邵，卓不可及。據姓范太平御覽參修。

### 徐穉

徐穉，字孺子，豫章南昌人也，少爲諸生，學嚴氏春秋，京氏易，歐陽尙書，兼綜外學，家貧常自耕稼，非其力不食，恭儉慈讓，閭里服其德化，陳蕃爲太守，以禮請署功曹，旣謁而退，蕃在郡不接賓客，惟穉來，特設一榻，去則縣之，後舉有道家拜太原太守，皆不就，延熹二年，尙書令陳蕃僕射胡廣等上疏薦穉等曰：「臣聞善人天地之紀，政之所由也，詩云：思皇多士，生此王國，天挺俊乂，爲陛下出，當輔弼明時，左右大業者也，伏見處士豫章徐穉，彭城姜肱，汝南袁閔，京兆韋著，潁川李曇，德行純備，著於人聽，若使擢登三事，協亮天工，必能翼宣盛美，增光日月矣，桓帝乃以安車元纁備禮徵之，並不至，穉嘗爲太尉黃瓊所辟，不就，瓊卒歸葬，穉乃負糧徒步到江夏赴之，設雞酒薄祭，哭畢而去，不告姓名，時會者四方名士，郭林宗等數十人，聞之，疑其穉也，選茅容輕騎追之，及於塗，容爲設飯，共言稼穡之事，臨訣去，謂容曰：「爲我謝郭林宗，大樹將顛，非一繩所維，何爲栖栖不遑寧處？」及林宗有母喪，穉往弔之，置生芻一束於廬前而去，林宗曰：「此必南州高士徐孺子也，詩不云乎：生芻一束，其人如玉，吾何德以堪之？」靈帝初，欲蒲輪聘穉，會卒，年七十。

二子亂字季登篤行孝悌亦隱居不仕。據謝承范疇後漢書參修。

郭蒼

郭蒼字伯起曲江人富有文學舉茂才爲荊州從事熹平三年太守周景開導昌樂六瀧流通商旅蒼爲撰神漢桂陽太守周府君碑曰桂陽太守周府君者徐州下邳人也諱愷字君光體性敦仁天資篤厚行興閨門名高州里舉孝廉拜尙書侍郎遷汝南固始相遂拜桂陽守宣魯衛之政敷二南之澤政以德綏化猶風騰撫集烝細振發有方進則貞直退則錯枉崇舉濟濟吉士充朝招賢訓蒙開誘六蔽君子道長小人道消信感神祇霧瑞符應嘉禾生於野奇草像薏苳異根之樹超然連理於此之時邦域爲寧郡又與南海接比商旅所臻自瀑亭至於曲紅一由此水其水源出於王禽之山山蓋隆崇峻極於天泉肇湧發射其顛分流離散爲十二川彌陵隔岨疊阜錯連隅甌壅遏末繇騁焉爾乃潰山鑽石經營溝畛激揚爭怒浮沉潛伏蛇龍詰屈澧陵鬱浥千渠萬澮落聚沿澗下迄安岳六瀧作難湍瀨溘溘汙汙淝淝雖詩稱百川沸騰高岸爲谷深谷爲陵蓋莫若斯天軌所經惡得已哉改其下流注也若奔車失轡狂牛無缺驟忽鱸陸不相知及其上也則羣輩相隨羶挽提攜唱號慷慨沈深在前其或敗也非徒喪寶玩隕珍奇替珠貝流象犀也往古來今變其終矣於是府君乃思夏后之遺謀缺應龍之顯化缺行旅之悲窮哀舟人之困阨感蜀守冰珍絕犂魑嘉天昧淵永用夷易適命良吏將帥壯夫挑移盤投之窮壑夷高填下鑿截回曲弼水之邪性順導其經脈斷頑礪之靈波弱陽侯之洶湧由是小溪乃平直大道克通利抱布

賀絲交易而至。升涉周旋。功萬於前。除昔缺顛樹表於茲。雖非龍門之鴻績。亦人君之德宗。故舟人歎於洲渚。行旅語於塗陸。孔子曰。禹不決江疏河。吾其魚矣。於是熹平三年。歲在攝提。仲冬之月。曲紅長零。陵重安區社。字景賢。遵承典憲。宣揚德訓。帥禮不越。欽仰高山。乃與邑子故吏龔臺郭蒼龔頌等。命工鑿石。建碑於瀧上。勒銘公功。傳之萬世。垂示無窮。其辭曰。乾坤剖兮建兩儀。剛柔分兮有險夷。咨中嶽兮據崔嵬。歎衡林兮獨傾虧。增陔隋兮甚區陔。鯀莫涉兮禹不窺。仰王禽兮又崎危。俯瀧淵兮恒以悲。岸參天兮無路蹊。石縱橫兮流洄洄。波隆隆兮聲若雷。或抱貨兮以從利。或追恩兮以赴義。汎自掉兮有不避。沈躬軀兮有元池。委性命兮於芒繩。潛寒慄兮不皇計。泛隨流兮殆忘歸。懿賢后兮發聖英。閔不通兮治斯谿。鑿巨石兮以湮填。開切促兮導曲機。推六瀧兮弱其勢。遏泌汨兮蛟龍藏。陸夫唱兮鱸人歌。名冠世兮超踰倫。今稱揚兮鏗流沙。功斐斐兮鎮海裔。君乎君乎壽不訾。陳水經注。金石錄。歐陽六一集參修。

### 姚俊

姚俊。字翁仲。錢塘人。少爲郡佐。負笈至太學受業。明經術災異。爲交趾太守。漢末棄官。入增城山中學道。遇東郭延師事之。延教俊九精煉氣輔星存心之術。復與神丹刀圭。俊服之成道。世謂主東華宮。爲北河司命云。據姓苑列仙傳參修。

### 董奉

董奉。字君異。侯官人也。生漢時。不知其歲。吳初有年少作其縣長。見君異若三十餘。不知有道也。罷去五

十餘年爲他職。行經侯官。諸故吏人皆往見。故長。君異亦往。顏色如昔。長宿識之。問曰。君無有道也。昔在縣時。年如君輩。今吾已皓白。而君猶少也。君異曰。偶爾耳。士燮爲交州刺史。得毒藥死。已三日。君異在南方。乃往以三九藥內燮口中。後四日遂活。乃爲君異起高樓於中庭。君異不飲食。惟啖脯棗。少飲酒。君異來就燮飲食。下樓忽如飛鳥。一年乃求去。還廬山下。居山間。時時爲人咒水治病。不取錢物。重病愈者。但使栽杏五株。輕者一株。數年有杏七萬餘株。杏每熟時。奉於樹下。作一草倉。語人曰。買杏者。自將一器。穀置倉中。取杏一器。有納穀少。而取杏多者。虎隨後逐之。自是買杏更無欺者。奉以其所得穀。賑救貧窮。供給行旅。歲消三千斛。穀尙有餘。蓋神仙者流。仁術濟世者也。後人於其栽杏處。祠祀至今焉。又會稽介象。字元則。亦漢末人。通五經。百家之言。能屬文。陰修道法。孫權徵象至武昌。稱爲介君。爲起第宅。以御帳給之。象屢求去。權賜梨一奩。象食之。卽死。殯埋之。次日。已至建業。以所賜梨付苑吏種之。吏表聞。權思象。爲祠以祭。按列仙傳。廬山記事參修。

虞國

虞國。餘姚人。漢末爲日南太守。有惠政。行部。每雙鴈隨軒。及還。餘姚鴈亦隨歸。國卒。鴈栖墓側不去。按虞姓譜

董黯

董黯。字叔建。越之句章人。江都相仲舒後也。事母孝。比鄰王寄之母。以黯能孝。諷寄。寄忌之。伺黯出。辱其



母黯恨之。母死，斬寄首以祭母，自陳於官。和帝詔釋其罪，且旌異行，召拜郎中，不就。據兩浙孝行傳。寧波志參修。

黃豪

黃豪，字子微，南海人。年十六，能通論語、毛詩、弱冠詣交趾部刺史舉茂才，因寓廣信，教授生徒。及徵至京師，除外黃令，約己儉節，麤衣蔬食，所得俸祿悉賜貧民。凡所剖決，一縣稱平。是時鄰邑蝗災，而獨外黃無有。歲屢豐稔，民先流移者皆相率歸之。闔境大治，其循良足稱云。據廣州先賢傳。太平御覽參修。

丁茂

丁茂，字仲慮，合浦人。少孤貧，性孝，事母服勤，色養得其歡心。母終，負土治墳，植松柏成行，白鹿游乎左右。馴擾不去，交趾郡邑競傳以為孝感。太守察孝廉，終身衰經不就，吏民皆敬重之。時蒼梧丁密亦以孝行顯聞，世謂丁氏多巨孝。據交廣記。太平御覽參修。

尹牙

尹牙，字猛德，合浦人。以才能仕為郡主簿。太守南陽終寵到官三年，哀形於色，未嘗啓笑。政治委諸牙，牙感其知己也，乃造膝請曰：「伏見明府四節悲歎，有慘戚之思者何也？」寵曰：「父為張太尉所害，重讐未報，是以長媿耳。」牙乃備僕服，自貶為人役，至宛陵，與張校園交通，竭節於張。伺其間隙，出入三年，乃先醉張左右近侍，以夜解縱諸馬，令之亂駭。張果出問故，牙因手刃之，持其首而還。事聞，天子奇其才，因赦不問。據交廣記。太平御覽參修。

徐登趙炳附

徐登者閩中人也。本女子。化爲丈夫。善巫術。東陽趙炳能爲越方善禁咒。時兵亂。疾疫大起。二人遇於烏傷溪水之上。遂約共以其術療病。各相謂曰。今旣同志。且可各試所能。登乃禁漢溪水。水不爲流。炳禁樹。樹卽生莢。禁人。人不能起。禁虎。虎伏。以大釘釘柱。入尺許。盛氣吹之。釘躍出。射去如弩箭之發。以盆盛水。吹氣作禁。魚龍立見。二人相視而笑。共行其道焉。登年長。炳師事之。貴尙清儉。禮神惟以東流水爲酌。削桑皮爲脯。但行禁架所療。皆除。後登物故。炳東入章安。人爲立祠於永康。曰趙侯祠。蚊蚋不入也。據後漢書  
• 異苑  
• 參修。

盛憲

盛憲字孝章。會稽人。舉孝廉。補尙書郎。器量雄偉。與兩弟宏仲總爲一時名士。路逢童子。怪而問之。答曰。魯國孔融。時年十餘。憲載歸。知其奇才。便結爲兄弟。升堂拜母。憲遷吳郡太守。孫策平定吳會。深忌之。融憂其不免。乃移書論之曰。歲月不居。時節如流。五十之年。忽焉已至。公爲始滿。融又過二。海內知識。零落殆盡。惟會稽盛孝章尙存。其人困於孫氏。妻孥湮沒。單子獨立。孤危愁苦。若使憂能傷人。此子不得復永年矣。春秋傳曰。諸侯有相滅亡者。桓公不能救。則桓公恥之。今孝章實丈夫之雄也。天下談士。依以揚聲。而身不免於幽執。命不期於旦夕。是吾祖不當論損益之友。而朱穆所以絕交也。公誠能馳一介之使。加咫尺之書。則孝章可致。友道可宏矣。今之少年。喜謗前輩。或能譏評孝章。孝章要爲有天下大名。九牧之

人所共稱歎。燕君市駿馬之骨，非欲以聘道里，乃當以招絕足也。惟公匡復漢室，宗社將絕，又能正之，正之之術，實須得賢，珠玉無經而自至者，以人好之也。況賢者之有足乎？昭王築臺以尊郭隗，隗雖小才，而逢大遇，竟能發明主之至心，故樂毅自魏往，劇辛自趙往，鄒衍自齊往，向使郭隗倒懸，而王不解，臨溺而王不拯，則士亦將高翔遠引，莫有北首燕路者矣。凡所稱引，自公所知，而復云云者，欲公崇篤斯義也。於是徵憲都尉，詔命未至，果爲吳所害矣。據漢文選國志參修。

#### 沈瑜弟儀

沈瑜，烏程人，與弟儀少有志行。瑜十歲，儀九歲，父亡，居喪毀瘠，過於成人。外祖盛孝章撫慰之曰：「汝並黃中通爽，終成奇器，何遽逾制自取滅性邪？」瑜早卒，儀篤學有雅才，以儒素自業，守道不移。州郡交辟不就。據萬姓譜修。

#### 姚文式

姚文式，合浦人，雅好誦讀，博通今古。建安中，舉茂才，仕爲交州治中。時步隲爲刺史，初到南海，覽土地形勢，歎曰：「斯誠海島膏腴之地，宜爲都也。」乃問尉陀舊治處，人莫能知。惟文式答曰：「南海郡昔治在今州城中，與番禺縣連接，今入城東南偏，有水坑陵城倚其上，聞此縣人民謂之爲番山，縣名番禺，儻謂番山之禺也。漢書所謂浮牂牁，下灘津，同會番禺，蓋乘斯水西入越也。秦并天下，略定揚越，開南海以謫徙民，至二世時，南海尉任囂聞陳勝作亂，召龍川令趙陀，告以大謀，囂卒，陀行南海尉事，乃拒關門設守，番禺其

所都也。後歸漢。築朝臺在州城東北三十里。則陀宮近是矣。隴登望得其處。遂立城郭。以建州治。綏和百粵。遂用寧集文式之功也。據沈懷遠南越志。水經注參修。

吳碭

吳碭字叔山。揭陽人。漢末察孝廉。為安成長。孫權使呂岱取長沙郡。碭據縣以拒之。權遣魯肅攻圍。碭突去曰。碭受天子命為長。知有漢不知有吳也。後權統有交廣。遣步騭為交州刺史。義碭而不見責。碭亦不復仕。據黃恭交廣記。三國志參修。

衡毅錢博附

衡毅蒼梧人。負勇謀。與同郡錢博皆為郡太守。長沙吳巨所信用。建安末。天下大亂。荊州牧劉表以賴恭為交州刺史。孫權以步騭為交州刺史。巨逐恭。恭奔零陵。騭將至。使人諭巨。巨納騭而後圖之。騭如巨與都督區景謀。乃召二人入計事。即於中庭斬首以徇。衆遂治舟船。合兵二萬。下取南海。毅與博念巨部曲舊恩。且隴之來。非漢命也。乃興兵逆騭於蒼梧高要嶮口。與隨軍戰。幾為所敗。會毅少卻。騭乘之。毅與衆皆投水死。死者千餘人。無一生降。毅博恩義結人。詎但勇謀而已。據三國志。水經注參修。

士燮

士燮字威彥。蒼梧廣信人也。其先魯國汶陽人。至王莽之亂。避地交州。六世至賜。為日南太守。燮少游學京師。事潁川太守劉子奇。治左氏春秋。察孝廉。補尚書郎。公事免官。父賜喪闋。舉茂才。除巫令。遷交趾太

守弟壹先爲都督郵。刺史丁宮徵還爲司徒。辟壹。董卓作亂入關。壹亡歸鄉里。交州刺史朱符爲夷賊所殺。州郡擾亂。壹乃表壹領合浦太守。次弟黼領九真太守。黼弟武領南海太守。壹體器寬厚。謙虛下士。中國士人往依避難者以百數。耽玩春秋。爲之注解。陳國袁徽與尙書令荀彧書。具見稱譽。武先病沒。獻帝聞張津死。賜發蠶書。進綏南中郎將。董督七郡。領交趾太守如故。天下喪亂。交州貢職不廢。復詔拜安遠將軍。封龍度亭侯。後奉步騭節度。孫權加左將軍。質其子厥。壹在郡四十餘年。黃武四年九十卒。其父子兄弟著名南土。車騎出入滿道。夷人夾轂焚香者。常數千焉。

據交廣記。三國志參修。

### 虞翻子祀

虞翻。字仲翔。會稽餘姚人也。少好學。有高氣。年十二。客有候其兄者。不過翻。翻追與書曰。僕聞琥珀不取腐芥。磁石不受曲鍼。過而不存。不亦宜乎。客得書奇之。由是見稱。爲孫策功曹。待以交友之禮。漢召爲侍御史。曹操辟司空。皆不就。翻與少府孔融書。示以所著易注。融答書曰。聞延陵之理樂。觀吾子之治易。乃知東南之美者。非徒會稽之竹箭也。孫權時爲騎都尉。翻數犯顏諫爭。每不悅。權旣爲吳王。歡宴之末。自起行酒。翻伏地佯醉不持。權去。翻起坐。權於是大怒。手劍欲擊之。侍坐者莫不惶遽。惟大司農劉基起抱。權力諫。翻由是得免。權因敕左右。自今酒後言殺。俱不得殺。翻性疎直。數有酒失。權與張昭論及神仙。翻指昭曰。彼皆死人。而語神仙。世豈有仙人也。權積怒非一。遂徙翻交州。寓南粵。王建德故園。雖處罪放。而講學不倦。門徒常數百人。又爲老子論語國語訓注。皆傳於世。翻旣放棄。嘗云。自恨疏節。骨體不媚。犯上

獲罪。當長沒海隅。生無可與語。死以青蠅為弔客。使天下人知己者。足以不恨。初山陰丁覽。大末徐陵。或在縣吏之中。或衆所未識。翻一見之。便與友善。終成顯名。在南十餘年。年七十卒。歸葬舊墓。妻子得還。翻十一子。第四子汜。最知名。汜字世洪。生南海。年十六。父卒。還鄉里。永安初。從選曹郎孫繼廢立時。欲入宮。為不軌。召百官會議。皆惶怖失色。汜對曰。明公上安宗廟。下惠百姓。自以伊霍復見。今迎立未至。而欲入宮。如是。羣下搖蕩。衆聽疑惑。非所以永終忠孝。揚名後世也。繼不懌。竟立休。後為散騎中常侍監軍使。者。討扶嚴。以功拜交州刺史冠軍將軍餘姚侯。尋卒。據三國志。會稽典錄參修。

李祖仁

李祖仁者。合浦人。兄弟十人。同居郡北江上。事親理家。並以慈孝廉讓。吳神鳳初。交州上其事。詔賜爵三級。郡人因名江曰慈廉。據御覽。交廣記參修。

王範

王範。南海人。好讀書。有鑒識。吳孫皓時。閉戶不出。或問其繇。曰。見彈繳而弗避。非靈禽也。處亂世而求聞達。非知士也。人以為名言。晉平吳後。行九品官人之法。每州置大小中正。俱以本土人為之。刺史熊睦。以範為廣州大中正。選舉人才。皆愜輿論。範蒐羅百粵典故為書。名交廣二州春秋。據晉書。廣州人物傳參修。

黃舒

黃舒。東莞人。事親至孝。盛暑未嘗脫冠帶。人以純孝稱之。父卒。躬負土為墳。結廬藉苦。以居其側。母喪亦

如之閩巷謂舒生能致養。沒能致哀。今之曾參也。因目其居曰參里。山曰參里山。宋沈懷遠南越志載舒事云。據廣州志修。

陶延

陶延字世賞。番禺人。父基。先為交州刺史。教夷人以婚姻。闔境化之。留從子居廣州。遂生延。材兼文武。晉元帝時。以功至伏波將軍。湘賊杜叢誘五溪蠻寇武昌。延將兵大破之。據黃恭交廣記。廣州舊志參修。

張魴

張魴字叔魚。始興郡人。明帝太寧初。舉孝廉。咸康中。為合滙令。三年化行。民謠頌之。有白鹿羣。其治取其一獻之。民因魴所築城。及城南有岡。皆以白鹿名之。據始興記及鄉道元水經注參修。

姚成甫

姚成甫。番禺人。幼聰悟。以學義知名。及長。州辟皆不就。性耽山水。不為世事所嬰。吳刺史陸胤苦南海水鹹。導泉為甘溪。後寢湮。成甫復濬之。晉咸安中。採菊於菖蒲澗。遇一老父。教之服菖蒲。曰。此安期生所餌。可以忘老。成甫如其言。築室甘溪之上。年八十餘卒。據水經注。廣州志參修。

黃恭

黃恭字義仲。南海人。刺史鄧岱錄為記室參軍。轉封山令。州察孝廉。舉為佐著作郎。父憂去職。服闋補廣州大中正。蒐緝王氏交廣春秋。補其遺漏。後復廣為十三州記。世傳其書。族子整為平越司馬。工文詞。據

覽英文志  
參修。

洗勁

洗勁南海人。家本武帥。至勁讀書。尚節操。為廣州中兵參軍。盧循攻廣州。勁出戰。城陷。為循所執。循欲釋而用之。勁叱曰。賊奴欲凌國士邪。遂遇害。刺史吳隱之上其事。義熙中。追贈始興太守。曲江縣侯。諡忠義。

據廣州人  
物傳修。

阮謙之

阮謙之。徐聞人。家本陳留。曾祖放。為交州刺史。留一子居肇雷水上。至謙之。仕郡功曹。遷奮威將軍。元嘉初。從征林邑王。大敗之。謙之振旅而還。其子孫多居遂溪。今猶有阮家村。據林邑記。水經注。雷州志參修。

廖冲

廖冲。字清虛。桂陽人。舉秀才。為梁郡主簿。武帝招徠天下名士。冲與焉。湘東王就國。請為常侍。凡王所為。多規諫之。日見疎薄。即浩然挂冠歸。結廬靜福山。托迹黃老。卒年九十七。據唐文粹。遵川志參修。

馮融

馮融。新會人。世為羅州刺史。至融。能以禮義威信鎮於俗。蕉荔之墟。絃誦日聞。每行部所至。蠻酋焚香具樂。望雙旌而拜。曰。馮都老來矣。子高梁太守寶。婚於郡大姓洗氏。俚人益受約束。隋平陳。嶺南共推洗氏為主。寶子僕。孫益。據廣州人物傳。新會志修。



韋善道

韋善道字守約南海人博學能詩少為縣吏節度使張九章奇之俾佐書記遂通三禮為零陵令遷柳州太守有八子長注遜跡不仕闢園鑿池朝臺之陽號韋隱居家缺

莫宣卿

莫宣卿字仲節開建人宣卿幼即雋拔一日與羣兒戲題詩有云我本南山鳳豈同凡鳥羣人大奇之構書屋於麒麟山下大中五年狀元及第授台州別駕以母老乞歸賜其鄉曰錦衣縣之金縷村有讀書堂片玉亭據案慶志文獻通考參修

楊環

楊環南海人力學工詩隱居羅浮咸通末登進士第先是夢登高臺耘草得玉麟後除宏文館校書郎人賀曰子居所謂麟臺芸閣也始悟所夢亡何拂衣歸隱至德令周繇與環友善又有黃隱居者家於朝臺往來羅浮與環莫逆時稱南濱三隱缺



右百越先賢志四卷。明順德歐大任楨伯撰。按此書明史明史稿藝文志焦竑國史經籍志均已著錄。蓋單行之本。而流傳絕少。此本附刻於歐虞部集中。卽以冠詩文之首。特拈出重梓之。每條備注出典。惟章善道楊環兩傳缺焉。卽仍之。東漢陳元有二。見儒林傳者。傳費氏易。見列傳者。傳左氏春秋。列傳稱元蒼梧人。辟司徒。歐陽歙府經典釋文。稱京兆陳元司空南閣祭酒。是二人里貫官資迥不相侔。但釋文又云。京兆陳元。字長孫。兼傳左氏春秋。則又混二人爲一。于後。地志遂沿之。此書錄陳元傳。獨言傳春秋。而不言傳易。尤可謂謹嚴。四庫提要稱舊有游朴刻本。已散佚。第存鈔本第二卷。養奮傳。蠡地。鄧盛。蔡毋俊。李進諸傳。皆殘缺。陳某一傳。殘缺尤甚。而此并無缺字。惟載郭蒼周憬碑中缺數字。乃仍歐陽氏集古錄之文。然黃通志亦如此。又傳蠡地無傳。與提要所言不合。未詳所以。辛卯秋八夕。後學伍元薇謹跋。